

Co i tuna sch'in derschader ha cumpassiun

Um pensiunà protesta fin a Losanna encunter sia taglia

■ **(anr/vi) In um pensiunà protesta fin al tribunal federal encunter sia taglia. El n'inoltrescha dentant betg l'imposiziun. Il derschader na po perquai betg entrar sin ses cas e mussa in zichel cumpassiun.** Per il solit fan els curtas. Sche las premissas per entrar sin in recurs n'èn betg dadas enumereschan ils derschaders las actas che mancan e decidan da betg entrar e cun quai basta. Ma sch'in recurrent percurra tuttas instanzas fin a Losanna – senza sustegn d'in advocat – e sa fida cumplainamain sin ses dretg e ch'el haja raschun, stattan ils derschaders magari mal sch'els na pon betg gidar u betg decider materialmain. Gliez na scrivan els sa chapescha betg, ma sch'ins legia in pau tranter las lingias las sentenzias sentan ins il malputgà dals pli auts giurists svizzers.

Senza advocat fin a Losanna

En quest cas ha il recurrent simpla-main emblidà dad inoltrar l'imposiziun u la decisiun da l'uffizi da taglia encunter la quala el ha protestà. L'um ha ses domicil da taglia en ina vischnanca grischuna. Questa primavaira sa drizza el a la dretgira administrativa grischuna e pretenda ch'i saja da revocar la decisiun da taglia. El saja uss i en pensiun ed i saja pia cler ch'el na stoppia betg pli pagar tanta taglia.

La dretgira fa attent il recurrent en in scriver che las premissas formalas per in recurs na bastian betg. L'um pensiunà ha diesch dis temp dad inoltrar il material necessari, per exempel

ina motivaziun concisa e la decisiun da taglia contestada. L'um respunda bain sin quest scriver, ma el na declera betg ils fatgs, na motivescha betg ses recurs e tralascha cunzunt dad inoltrar la decisiun da l'uffizi da taglia. La dretgira decida da betg entrar sin la chaussa. Il recurrent tira vinavant il cas a Losanna.

Formalissem stravagà

Là repeta il recurrent ch'el saja i en pensiun. I saja perquai bain evident ch'i media lura la basa d'imposiziun. I saja formalissem stravagà che la dretgira administrativa na saja betg entrata sin ses recurs mo perquai ch'i haja mancà ina motivaziun. L'emna passada ha il tribunal federal publitgà sia decisiun ed en singulas construcziuns audan ins in tschert malputgà.

«Schizunt sch'ins resguarda ch'i sa tracta d'in recurs d'in laic, nua ch'ins na tschenta tenor pratica betg memia autras pretensiuns formalas, na correspunda l'inoltraziun preschentada betg a questas pretensiuns», scriva il derschader. Damai ch'i manchia ina motivaziun sufficiente na possa il tribunal federal betg entrar sin il recurs.

Tgi che succumba avant dretgira sto per il solit purtar ils custs da la procedura. En quest connex scriva il derschader il davos: «En vista als fatgs pari dad esser giustifitgà da renunziar dad adossar ils custs.»

Sentenzia 2C_627/2018 dals 25 da fanadur 2018, publitgada ils 9 d'avust 2018.